

MICHEL DE MONTAIGNE
ESSAYS



Book 1 · Chapter 56

Original text in Middle French (1595, Public domain) · Last updated on February 14, 2022

HYPERESSAYS is a project to create a modern and accessible online edition of the *Essays* of Michel de Montaigne. More information at www.hyperessays.net

GOURNAY-1-56-20250106-190926

Des prieres

^a JE propose des fantasies informes & irresolues, comme font ceux qui publient des questions douteuses, à débattre aux écoles : non pour établir la vérité, mais pour la chercher : Et les soubmets au jugement de ceux à qui il touche de régler non seulement mes actions & mes escrits, mais encore mes pensées. Esgalement m'en sera acceptable & utile la condamnation, comme l'approbation, ^ctenant pour absurde & impie, si rien se rencontre ignoramment ou inadvertamment couché en cette rapsodie contraire aux saintes resolutions & prescriptions de l'Eglise Catholique Apostolique & Romaine, en laquelle je meurs, & en laquelle je suis nay. ^a Et pourtant me remettant tousjours à l'authorité de leur censure, qui peut tout sur moy, je me mesle ainsi temerairement à toute sorte de propos : comme icy. ^a Je ne sçay si je me trompe : mais puis que par une faveur particuliere de la bonté Divine, certaine façon de priere nous a esté prescrite & dictée mot à mot par la bouche de Dieu, il m'a tousjours semblé que nous en devons avoir l'usage plus ordinaire, que nous n'avons : Et si j'en estoy creu, à l'entrée & à l'issuë de nos tables, à nostre lever & coucher, & à toutes actions particulieres, ausquelles on a accoustumé de mesler des prieres, je voudroy que ce fust le patenostre, que les Chrestiens y employassent, ^c sinon seulement, au moins tousjours. ^a L'Eglise peut estendre & diversifier les prieres selon le besoin de nostre instruction : car je sçay bien que c'est tousjours mesme substance, & mesme chose : Mais on devoit donner à celle-là ce privilege, que le peuple l'eust continuellement en la bouche : car il est certain qu'elle dit tout ce qu'il faut, & qu'elle est tres-propre à toutes occasions. ^c C'est l'unique priere, dequoy je me sers par tout, & la repete au lieu d'en changer. ^c D'où il advient, que je n'en ay aussi bien en memoire, que cette-là. ^a J'avoy presentement en la pensée, d'où nous venoit cett' erreur, de recourir à Dieu en tous nos desseins & entreprises, ^b & l'appeller à toute sorte de besoin, & en quelque lieu que nostre foiblesse veult de l'aide, sans considerer si l'occasion est juste ou injuste ; & d'escrier son nom, & sa puissance, en quelque estat, & action que nous soyons, pour vitieuse qu'elle soit. ^a Il est bien nostre seul & unique protecteur, ^c & peut toutes choses à nous ayder : ^a mais encore qu'il daigne nous honorer de cette douce alliance paternelle, il est pourtant autant juste, comme il est bon, ^c & comme il est puissant : mais il use bien plus souvent de sa justice, que de son pouvoir, ^a & nous favorise selon la raison d'icelle, non selon noz

demandes. c Platon en ses loix fait trois sortes d'injurieuse creance des Dieux, Qu'il n'y en ayt point, Qu'ils ne se meslent pas de noz affaires, Qu'ils ne refusent rien à noz vœux, offrandes & sacrifices. La premiere erreur, selon son advis, ne dura jamais immuable en homme, depuis son enfance, jusques à sa vieillesse. Les deux suyvantes peuvent souffrir de la constance. a Sa justice & sa puissance sont inseparables : Pour neant implorons nous sa force en une mauvaise cause : Il faut avoir l'ame nette, au moins en ce moment, auquel nous le prions, & deschargée de passions vitieuses : autrement nous luy presentons nous mesmes les verges, dequoy nous chastier. Au lieu de rabiller nostre faute, nous la redoublons ; presentans à celuy, à qui nous avons à demander pardon, une affection pleine d'irreverence & de haine. Voyla pourquoy je ne louë pas volontiers ceux, que je voy prier Dieu plus souvent & plus ordinairement, si les actions voisines de la priere, ne me tesmoignent quelque amendement & reformation.

b *Si nocturnus adulter*

Tempora sanctonico uelas adoperta cucullo.

c Et l'assiette d'un homme meslant à une vie execrable la devotion, semble estre aucunement plus condamnable, que celle d'un homme conforme à soy, & dissolu par tout. Pourtant refuse nostre Eglise tous les jours, la faveur de son entrée & societé, aux mœurs obstinées à quelque insigne malice. a Nous prions par usage & par coustume : ou pour mieux dire, nous lisons ou prononçons noz prieres : ce n'est en fin que mine : b Et me desplaist de voir faire trois signes de croix au Benedicite, autant à Graces (& plus m'en desplaist-il de ce que c'est un signe que j'ay en reverence & continuel usage, c mesmement quand je baaille) b & cependant toutes les autres heures du jour, les voir occupées à la haine, l'avarice, l'injustice. Aux vices leur heure, son heure à Dieu, comme par compensation & composition. C'est miracle, de voir continuer des actions si diverses d'une si pareille teneur, qu'il ne s'y sente point d'interruption & d'alteration aux confins mesmes, & passage de l'une à l'autre. c Quelle prodigieuse science se peut donner repos, nourrissant en mesme giste, d'une societé si accordante & si paisible, le crime & le juge ? Un homme, de qui la paillardise, sans cesse regente la teste, & qui la juge tres odieuse à la veuë divine, que dit-il à Dieu, quand il luy en parle ? Il se rameine, mais soudain il rechoit. Si l'object de la divine justice, & sa presence frappoient, comme il dit, & chastioient son ame, pour courte qu'en fust la penitence, la crainte mesme y rejetteroit si souvent sa pensée, qu'incontinent il se verroit maistre de ces vices, qui sont habitués & acharnés en luy. Mais quoy, ceux qui couchent une vie entiere, sur le fruit & emolument du peché, qu'ils sçavent mortel ? Combien avons nous de mestiers & vacations receuës, dequoy l'essence est vicieuse ? Et celuy qui se confessant à moy, me recitoit, avoir tout un aage fait profession & les effects d'une religion damnable selon luy, & contradictoire à celle qu'il avoit en son coeur, pour ne perdre son credit & l'honneur de ses charges : comment patissoit-il ce discours en son courage ? De quel langage entretiennent ils sur ce subject, la justice divine ? Leur repentance consistant en visible & maniable reparation, ils perdent & envers Dieu, & envers nous, le moyen de l'alleguer. Sont-ils si hardis de demander pardon, sans satisfaction & sans repentance ? Je tien que de ces premiers il en va, comme de ceux-cy : mais l'obstination n'y est pas si aisée à convaincre. Cette contrariété & volubilité d'opinion si soudaine, si

violente, qu'ils nous feignent, sent pour moy son miracle. Ils nous representent l'estat d'une indigestible agonie. Que l'imagination me sembloit fantastique, de ceux qui ces années passées, avoient en usage de reprocher tout chacun, en qui il reluysoit quelque clarté d'esprit, professant la religion Catholique, que c'estoit à feinte : & tenoyent mesme, pour luy faire honneur, quoy qu'il dist par apparence, qu'il ne pouvoit faillir au dedans, d'avoir sa creance reformée à leur pied. Fascheuse maladie, de se croire si fort, qu'on se persuade, qu'il ne se puisse croire au contraire : Et plus fascheuse encore, qu'on se persuade d'un tel esprit, qu'il prefere je ne sçay quelle disparité de fortune presente, aux esperances & menaces de la vie eternelle ! Ils m'en peuvent croire : Si rien eust deu tenter ma jeunesse, l'ambition du hazard & difficulté, qui suyvoient cette recente entreprinse, y eust eu bonne part. ^a Ce n'est pas sans grande raison, ce me semble, que l'Eglise deffend l'usage promiscue, temeraire & indiscret des saintes & divines chansons, que le Saint Esprit a dicté en David. Il ne faut mesler Dieu en nos actions qu'avecque reverence & attention pleine d'honneur & de respect. Cette voix est trop divine, pour n'avoir autre usage que d'exercer les poulmons, & plaire à nos oreilles. C'est de la conscience qu'elle doit estre produite, & non pas de la langue. Ce n'est pas raison qu'on permette qu'un garçon de boutique parmy ces vains & frivoles pensemens, s'en entretienne & s'en joué. ^b Ny n'est certes raison de voir tracasser par une salle, & par une cuysine, le Saint livre des sacrez mysteres de nostre creance. ^c C'estoient autrefois mysteres, ce sont à present desduits & esbats. ^b Ce n'est pas en passant, & tumultuairement, qu'il faut manier un estude si serieux & venerable. Ce doit estre une action destinée, & rassise, à laquelle on doit tousjours adjouster cette preface de nostre office, *sursum corda*, & y apporter le corps mesme disposé en contenance, qui tesmoigne une particuliere attention & reverence. ^c Ce n'est pas l'estude de tout le monde : c'est l'estude des personnes qui y sont vouées, que Dieu y appelle : Les meschans, les ignorants s'y empirent. Ce n'est pas une histoire à compter : c'est une histoire à reverer, craindre & adorer. Plaisantes gents, qui pensent l'avoir renduë maniable au peuple, pour l'avoir mise en langage populaire. Ne tient-il qu'aux mots, qu'ils n'entendent tout ce qu'ils trouvent par escrit ? Diray-je plus ? Pour l'en approcher de ce peu, ils l'en reculent. L'ignorance pure, & remise toute en autruy, estoit bien plus salutaire & plus sçavante, que n'est cette science verbale, & vaine, nourrice de presumption & de temerité. ^b Je croy aussi que la liberté à chacun de dissiper une parole si religieuse & importante, à tant de sortes d'idiomes, a beaucoup plus de danger que d'utilité. Les Juifs, les Mahometans, & quasi tous autres, ont espousé, & reverent le langage, auquel originellement leurs mysteres avoient esté conceuz, & en est deffenduë l'alteration & changement ; non sans apparence. Sçavons nous bien qu'en Basque, & en Bretagne, il y ayt des Judges assez, pour establir cette traduction faicte en leur langue ? l'Eglise universelle n'a point de jugement plus ardu à faire, & plus solemne : En preschant & parlant, l'interpretation est vague, libre, muable, & d'une parcelle : ainsi ce n'est pas de mesme. ^c L'un de noz historiens Grecs accuse justement son siecle, de ce que les secrets de la religion Chrestienne, estoient expandus emmy la place, és mains des moindres artisans : que chacun en pouvoit debatre & dire selon son sens. Et que ce nous devoit estre grande honte, nous qui par la grace de Dieu, jouyssons des purs mysteres de la pieté, de les laisser profaner en la bouche de personnes ignorantes & populaires, veu que les Gentils interdissoient à Socrates, à Platon, & aux

plus sages, de s'enquerir & parler des choses commises aux Prestres de Delphes. Dit aussi, que les factions des Princes, sur le subject de la Theologie, sont armées non de zele, mais de cholere, Que le zele tient de la divine raison & justice, se conduisant ordonnément & moderément : mais qu'il se change en haine & envie : & produit au lieu du froment & du raisin, de l'yvroye & des orties, quand il est conduit d'une passion humaine. Et justement aussi, cet autre, conseillant l'Empereur Theodose, disoit, les disputes n'endormir pas tant les schismes de l'Eglise, que les esveiller, & animer les heresies. Que pourtant il falloit fuir toutes contentions & argumentations Dialectiques, & se rapporter nuement aux prescriptions & formules de la foy, establies par les anciens. Et l'Empereur Andronicus, ayant rencontré en son palais, des principaux hommes, aux prises de parole, contre Lapodius, sur un de noz points de grande importance, les tança, jusques à menacer de les jeter en la riviere, s'ils continuoient. *c* Les enfants & les femmes, en nos jours, regentent les hommes plus vieux, & experimentez, sur les loix Ecclesiastiques : Là où la premiere de celle de Platon leur deffend de s'enquerir seulement de la raison des loix civiles, qui doivent tenir lieu d'ordonnances divines. Et permettant aux vieux, d'en communiquer entre eux, & avec le Magistrat : il adjouste, pourveu que ce ne soit en presence des jeunes, & personnes profanes. *c* Un Evesque a laissé par escrit, qu'en l'autre bout du monde, il y a une Isle, que les anciens nommoient Dioscoride : commode en fertilité de toutes sortes d'arbres & fruits, & salubrité d'air : de laquelle le peuple est Chrestien, ayant des Eglises & des Autels, qui ne sont parez que de croix, sans autres images : grand observateur de jeusnes & de festes : exacte payeur de dismes aux Prestres : & si chaste, que nul d'eux ne peut connoistre qu'une femme en sa vie. Au demeurant, si contant de sa fortune, qu'au milieu de la mer, il ignore l'usage des navires : & si simple, que de la religion qu'il observe si songneusement, il n'en entend un seul mot. Chose incroyable, à qui ne sçauroit, les Payens si devots idolatres, ne connoistre de leurs Dieux, que simplement le nom & la statuë. *c* L'ancien commencement de Menalippe, tragedie d'Euripides, portoit ainsi :

c O Jupiter, car de toy rien sinon
Je ne connois seulement que le nom.

b J'ay veu aussi de mon temps, faire plainte d'aucuns escrits, de ce qu'ils sont purement humains & philosophiques, & sans meslange de Theologie. Qui diroit au contraire, ce ne seroit pourtant sans quelque raison ; Que la doctrine divine tient mieux son rang à part, comme Royne & dominatrice : Qu'elle doit estre principale par tout, point suffragante & subsidiaire : Et qu'à l'aventure se prendroient les exemples à la Grammaire, Rhetorique, Logique, plus sortablement d'ailleurs que d'une si sainte matiere ; comme aussi les arguments des Theatres, jeux & spectacles publiques. Que les raisons divines se considerent plus venerablement & reveremment seules, & en leur stile, qu'appariées aux discours humains. Qu'il se voit plus souvent cette faute, que les Theologiens escrivent trop humainement, que cett'autre, que les humanistes escrivent trop peu theologalement. La Philosophie, dit S. Chrysostome, est pieça banie de l'escole sainte, comme servante inutile, & estimée indigne de voir seulement en passant de l'entrée, le sacraire des saints Thresors de la doctrine celeste. Que le dire humain a ses formes plus basses, & ne se doit servir de la dignité, majesté, regence, du parler divin. Je luy laisse pour moy, dire, *c* *verbis indisciplinatis*, *b*

fortune, destinée, accident, heur, & malheur, & les Dieux, & autres frases, selon sa mode. ^cJe propose les fantasies humaines & miennes, simplement comme humaines fantasies, & separement considerées : non comme arrestées & reiglées par l'ordonnance celeste, incapable de doute & d'altercation. Matiere d'opinion, non matiere de foy. Ce que je discours selon moy, non ce que je croy selon Dieu, d'une façon laïque, non clericale : mais tousjours tres-religieuse. Comme les enfants proposent leurs essays, instruisables, non instruisants. ^bEt ne diroit-on pas aussi sans apparence, que l'ordonnance de ne s'entremettre que bien reservément d'escrire de la Religion, à tous autres qu'à ceux qui en font expresse profession, n'auroit pas faute de quelque image d'utilité & de justice ; & à moy avec, peut estre de m'en taire. ^aOn m'a dict que ceux mesmes, qui ne sont pas des nostres, deffendent pourtant entre eux l'usage du nom de Dieu, en leurs propos communs : Ils ne veulent pas qu'on s'en serve par une maniere d'interjection, ou d'exclamation, ny pour tesmoignage, ny pour comparaison : en quoy je trouve qu'ils ont raison. Et en quelque maniere que ce soit, que nous appellons Dieu à nostre commerce & societé, il faut que ce soit serieusement, & religieusement. ^a Il y a, ce me semble, en Xenophon un tel discours, où il montre que nous devons plus rarement prier Dieu : d'autant qu'il n'est pas aisé, que nous puissions si souvent remettre nostre ame, en cette assiette reglée, reformée, & devotieuse, où il faut qu'elle soit pour ce faire : autrement nos prieres ne sont pas seulement vaines & inutiles, mais vitieuses. Pardonne nous, disons nous, comme nous pardonnons à ceux qui nous ont offensez. Que disons nous par là, sinon que nous luy offrons nostre ame exempte de vengeance & de rancune ? Toutesfois nous invoquons Dieu & son ayde, au complot de noz fautes, & le convions à l'injustice.

^b *Quæ nisi seductis nequeas committere diuis.*

^a L'avaricieux le prie pour la conservation vaine & superflue de ses thresors : l'ambitieux pour ses victoires, & conduite de sa fortune : le voleur l'employe à son ayde, pour franchir le hazard & les difficultez, qui s'opposent à l'execution de ses meschantes entreprises : ou le remercie de l'aisance qu'il a trouvé à desgosiller un passant. ^cAu pied de la maison, qu'ils vont escheller ou petarder, ils font leurs prieres, l'intention & l'esperance pleine de cruauté, de luxure, & d'avarice.

^b *Hoc ipsum quo tu louïs aurem impellere tentas,
Dic agedum, Staio, proh Iuppiter, o bone, clamet,
Iuppiter, at sese non clamet Iuppiter ipse.*

^a La Royne de Navarre Margueritte, recite d'un jeune Prince, & encore qu'elle ne le nomme pas, sa grandeur l'a rendu connoissable assez, qu'allant à une assignation amoureuse, & coucher avec la femme d'un Advocat de Paris, son chemin s'addonnant au travers d'une Eglise, il ne passoit jamais en ce lieu saint, allant ou retournant de son entreprise, qu'il ne fist ses prieres & oraisons. Je vous laisse à juger, l'ame pleine de ce beau pensement, à quoy il employoit la faveur divine : Toutesfois elle allegue cela pour un tesmoignage de singuliere devotion. Mais ce n'est pas par cette preuve seulement qu'on pourroit verifier que les femmes ne sont gueres propres à traiter les matieres de la Theologie. ^a Une vraye priere, & une religieuse reconciliation de nous à Dieu, elle ne peut tomber en une ame impure & sousmise, lors mesmes, à la domination

de Satan. Celuy qui appelle Dieu à son assistance, pendant qu'il est dans le train du vice, il fait comme le coupeur de bourse, qui appelleroit la justice à son ayde ; ou comme ceux qui produisent le nom de Dieu en tesmoignage de mensonge.

*b tacito mala uota susurro,
Concipimus.*

^a Il est peu d'hommes qui ozassent mettre en evidence les requestes secrettes qu'ils font à Dieu.

*a Haud cuiuis promptum est, murmurque humilésque susurros
Tollere de templis, & aperto uiuere uoto.*

^a Voyla pourquoy les Pythagoriens vouloyent qu'elles fussent publiques, & ouyes d'un chacun ; afin qu'on ne le requist de chose indecente & injuste, comme celuy-là :

*a clarè cum dixit, Apollo,
Labra mouet metuens audiri : pulchra Lauerna
Da mihi fallere, da iustum sanctumque uideri.
Noctem peccatis, & fraudibus obiice nubem.*

^c Les Dieux punirent grièvement les iniques vœux d'Oedipus en les luy ottroyant. Il avoit prié, que ses enfants voidassent entre eux par armes la succession de son estat ; il fut si miserable, de se voir pris au mot. Il ne faut pas demander, que toutes choses suivent nostre volonté, mais qu'elle suive la prudence. ^a Il semble, à la verité, que nous nous servons de nos prieres, ^c comme d'un jargon, & ^a comme ceux qui employent les paroles saintes & divines à des sorcelleries, & effects magiciens : & que nous facions nostre compte que ce soit de la contexture, ou son, ou suite des motz, ou de nostre contenance, que depende leur effect. Car ayans l'ame pleine de concupiscence, non touchee de repentance, ny d'aucune nouvelle reconciliation envers Dieu, nous luy allons presenter ces parolles que la memoire preste à nostre langue : & esperons en tirer une expiation de nos fautes. Il n'est rien si aisé, si doux, & si favorable que la loy divine : elle nous appelle à soy, ainsi fautiers & detestables comme nous sommes : elle nous tend les bras, & nous reçoit en son giron, pour vilains, ords, & bourbeux, que nous soyons, & que nous ayons à estre à l'advenir. Mais encore en recompense, la faut-il regarder de bon œil : encore faut-il recevoir ce pardon avec action de graces : & au moins pour cet instant que nous nous adressons à elle, avoir l'ame desplaisante de ses fautes, & ennemie des passions qui nous ont poussé à l'offencer : ^c Ny les Dieux, ny les gens de bien, dict Platon, n'acceptent le present d'un meschant.

*b Immunis aram si tetigit manus,
Non sumptuosa blandior hostia
Molliuit auersos Penates,
Farre pio & saliente mica.*